

Хө киргългъиг шамдахмн

Целинн района Троицк совхозин конторас 300 метр газрт хө киргългънă пункт бăанă. Эн пунктд орад ирхлă, тўрулдж нўднд ўзгдх газрт, кезă альк ўдрлă, ямаран хўўчин отар эклдж киргългдăд дуусгдх график ўлгăтă бăанă. График май сарин 23-д совхозин ах зоотехник Н. В. Гуненко бичăд, директор ўр М. М. Жижинă гарар батлгддж.

Графикър болхла, Сонхлаев Сергей хўўчин отар—1096 тўлг хўўдиг майин 24-д эклдж хăăчлăд 25-д дуусхмн гиджăнă. Тегăд эн график хăлăгъăд зогсджахла, теглг нургъта харулан залу ордж ирв.

—Залу мендвт, неритн кемб гихлă,—Сонхлаев Сергей гидг кўмб гив. Графикър болхла—тана отартн майин 25-д хăăчлгдăд, сăн идгтă газрур гарх бăăдлтă. Ода 29 кўртл иим удан ягъджахмт, гихлă ўўрнъ зогсджасн пунктн толгъач В. И. Бойко келв:

—Ясн уга келър ю болв чигн келдг, цагъан цаасн деер сансан бичдг,—гигъăд мана ахлачир толгъадан орсан бичцхăдмн.

Хө киргългън эклхăс хойр долан хонг урд, хург кегъăд, хўўнă арс киргълдж ўзўлăд киргълчнриг сургълхмн гилă.

Келсн ўгдăн кўрч чадсн уга. Урдаснъ амт дасхсн уга. Киргългънă агрегатс чигн сăанър белдгдсн уга.

Мана ах зоотехник Гуненко май сарин 23 асхн отаран авч ир гидж Цунхлаевиг зак-ла. Тернъ хўўдăн туугъад авч ирв. Манъгъдуртнъ нăамхн машинксър эклдж хăăчлввдн. Тўрун ўдртăн 40 толгъагъас ўлў хăăчлджăсн угавдн. Дўрвдгч ўдртнъ киргългънă 19 машинкс зогсагдв. Хойр ўдрин эргцд бидн 1096 хө киргълдж дуусхин ормд зургълдгч ўдртăн, майин 29-д арă гидж чилăджăнăвдн. Сăн идг чигн уга, элвг усн чигн уга, эн хўўдм ээргдă бăăдж эцджăнă,—гидж хўўч гундлта бăанă.

Директорин батлсн графикър болха, эн пунктд хө киргългън, май сарин 24-д эклгдăд, июнь сарин 16 кўртл 11141 толгъа хон хăăчлгддж дуусгдхмн билă, эс гидж ўдрин 484 хө киргълх зўвтă. Ода деерăн ўдртăн, ик зовлнъгтагълар, 166 толгъа хө киргълджăнă. Иим бăăдлиг ясхин тўлă эднд эрдмтă нег сăн кўн кергтă. Хўўнă киргългъиг тиигдж эс ясхла, хө киргългънă кўдлмш чилăнă гидгнъ ик удан тўр болх бăăдлтă.

Д. БОСХМДЖИЕВ.